



Sumáriu Kazu
Tribunál Distritál Baukau
Mai 2022

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Baukau

1. Totál kazu ne'ebé JSMP monitoriza: 21

Artigu	Tipu Kazu	Númeru
Artigu 145 Kódigu Penál (KP) & artigu 2, 3, no 35 letra (b) Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime Violénsia Doméstika (VD) sira no artigu 36 kona-ba krime sira violénsia doméstika nian hanesan krime públiku)	11
Artigu 155 KP & artigu 2, 3, no 35 LKVD	Maus-tratus ba menór	1
Artigu 20 (1) Lei Arma Brankas	Arma Brankas	1
Artigu 145 KP, artigu 20 (1) no artigu 19 (1) Lei Arma Brankas	Ofensa ba integridade física simples, Arma Brankas no rama ambon	1
Artigu 154 KP & artigu 2, 3, no 35 letra (a) LKVD	Maus-tratus ba konjuje	3
Artigu 154 KP & artigu 2, 3, no 35 letra (a) LKVD no artigu 20 (1) lei arma brankas	Maus-tratus ba konjuje no arma brankas	1
Artigu 177 KP	Abuzu seksuál ba menór	1

Artigu 259 KP	Danu agravadu	1
Artigu 244 (1 ali a) KP	Des-obideinsia	1
Totál		21

2. Totál desizaun ne'ebé JSMP monitoriza: 15

Tipu desizaun	Artigu	Númeru
Pena prizaun	Artigu 66	1
Suspensaun ba prizaun nia ezekusaun	Artigu 68 KP	13
Suspensaun ba prizaun nia ezekusaun no omologa	Artigu 68 KP no 216 KP	1
Totál		15

3. Totál kazu sira ne'ebé adia tuir JSMP nia monitorizasaun: 0

4. Totál kazu ne'ebé sei kontinua prosesu tuir JSMP nia monitorizasaun: 6

B. Deskrisaun sumáriu julgamentu ba desizaun kazu sira

1. Krime ofensa ba integridade física simples ho natureza violénsia doméstika

Nú. Prosesu : 0016/21MNMNT
 Kompozisaun Tribunál : Singulár
 Juis : Dra. Sribuana da Costa
 Prokuradór : Dr. Bartolomeu de Araújo
 Defeza : Dr. Sidonio Maria sarmento
 Desizaun : Pena prizaun fulan 1 suspende ba tinan 1

Iha 04 Maiu 2022, Tribunál Distritál Baukau prezide julgamentu leitura sentenssa ba krime ofensa ba integridade simples ho natureza violénsia doméstika ne'ebé envolve arguidu DdC hasoru nia feen, iha Munisípiu Manatuto.

Akuzasaun Prokuradór

Prokuradór akuza katak 11 Juñu 2021, iha oras tuku 08:00 dadeer arguidu foti raga baku dala ida iha lezada nia tilun hun parte karuk kanek no ran. Antes ne'e lezada bolu sira nia manu atu fó han no manu oan ida mak laiha. Arguidu husu ba lezada dehan manu oan ida laiha no lezada hatan dehan nia lahatene tanba lezada ba tiha halo dosi iha lezada nia kuñada nia uma. Arguidu la simu, diskute malu ho lezada no halo agresaun refere hasoru lezada.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak sira diskute malu kona-ba manu oan ne'ebé lakon arguidu nerbozu foti raga rounpa nian baku dala ida iha lezada nia tilun hun parte karuk rezulta kanek no ran sai. Depoizde akontese liu loron rua sira di'ak malu fali, arrepende ninia hahalok, foin primeiravéz mai hatan iha tribunál no to'o agora la baku ona lezada.

Alende ne'e lezada konfirma faktu hotu iha akuzasaun, depoizde akontese lezada ba hato'o keixa iha Polísia no ba tratamentu iha sentru saúde Manatuto, sira di'ak malu ona, hela hamutuk nafatin iha uma ida no to'o agora la baku ona lezada.

Alegasaun finál

Prokuradór haktuir katak akuzasaun provadu hotu bazeia ba arguidu no lezada nia deklarasaun, mezmu sira di'ak malu ona maibé nafatin husu nafatin atu halo prevensaun atu arguidu la komete tan hahalok hanesan iha futuru. Tanba ne'e husu ba tribunál atu kondena arguidu ho pena prizaun fulan ida suspende ba tinan ida.

Entretantu, defeza akresenta katak arguidu konfesa faktu sira ne'ebé mak konstituiu ba krime, arrepende ninia hahalok, di'ak malu ona, foin primeiravés mai hatan iha tribunál no promete sei la repete tan hahalok hanesan iha futuru. Tanba ne'e husu ba tribunál atu aplika pena ne'ebé kmaan ba arguidu.

Desizaun

Depoizde avalia faktu hotu, tribunál prova katak arguidu halo duni agresaun hasoru lezada, arguidu foti raga baku dala ida iha lezada nia tilun hun parte karuk, kanek nakles no ran sai. Bazeia ba faktu provadu sira ne'e no tetu mós sirkunstánsia atenuante sira hanesan arrepende ninia hahalok, foin primeravés mai hatan iha tribunál, nune'e tribunál konklui prosesu ne'e kondena arguidu ho pena prizaun fulan ida suspende ba tinan ida.

2. Krime ofensa ba integridade física simples ho natureza violénsia doméstika

Nú. Prosesu : 0015/21.MNLLB
Kompozisaun Tribunál : Singulár
Juis : Dra. Sribuana da Costa
Prokuradór : Dr. João Marques
Defeza : Dr. Grigório Maria Lourdes de Lima
Desizaun : Pena prizaun fulan 1 suspende ba tinan 1

Iha 09 Maiu 2022, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AdA hasoru nia feen, iha Munisípiu Manatuto.

Akuzasaun Prokuradór

Prokuradór akuza katak iha 04 Juñu 2021 iha oras tuku 08:00 dadeer arguidu ho kondisaun lanu tuku dala ida iha lezada nia kabas parte loos rejulta moras maibé lezada la ba konsulta iha ospital. Antes ne'e arguidu husu osan ba lezada no lezada hatan dehan osan laiha, arguidu nerbosu no halo agresaun hasoru lezada.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu sirane'e loos hotu, arguidu ho kodisaun lanu mak husu osan ba lezada no lezada hatan dehan osan la iha ne'e mak sira diskute malu, arguidu tuku dala ida iha lezada nia kabas parte loos, maibé depoisde akontese sira di'ak malu kedas, arrepende ninia hahalok foin primeiravés mai hatan iha tribunál no promete sei la repete tan ninia hahalok hanesan iha futuru .

Alende ne'e Lezada konfirma ba faktu sira hotu iha akuzasaun, depoisde akontese sira di'ak malu fali, antes no depois mós arguidu la halo agresaun hasoru lezada to'o agora no momentu akontesementu ne'e lezada mós la ba halo tratamentu.

Alegasaun finál

Prokuradór akresenta katak arguidu provadu komete krime tuirartigu 145 KP no lei nú.7/2010 LKVD mezmú sira di'ak malu ona maibé atu halo prevensaun iha futuru nune'e husu ba tribunál atu kondena arguidu ho pena prizaun fulan rua suspende ba tinan ida.

Defeza akresenta katak tau konsiderasaun ba arguidu nia konfiksaun no lezada sira nia konfirmasaun hanesan di'ak malu ona, arrepende ninia hahalok no foin primeiravés mai hatan iha tribunál, nunne'e husu ba tribunál atu aplika pena ne'ebé adekuaudu ba arguidu.

Desizaun

Depoisde avalia faktu hotu, tribunál prova katak arguidu tuku dala ida iha lezada nia kabas parte loos. Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena prizaun fulan ida suspende ba tinan ida.

3. Krime ofensa ba integridade física simples ho natureza violénsia doméstika

Nú. Prosesu : 0001/22.BCBQI
Kompozisaun Tribunál : Singulár
Juis : Dra. Sribuana da Costa
Prokuradór : Dr. João Marques
Defeza : Dr. Grigório Maria Lourdes de Lima
Desizaun : Pena prizaun fulan 2 suspende ba tinan 1

Iha 09 Maiu 2022, Tribunál Distritál Baukau prezide julgamentu leitura sentensa krime ofensa ba integridade fizika simples ho natureza violénsia doméstika ne'ebé envolve arguidu JFR hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 17 Janeiro 2022 iha oras tuku 09:00 dadeer arguidu tuku dala rua iha lezada nia kanuruk, tebe dala ida iha lezada nia kidan parte karuk buti iha lezada nia kakorok rezulta moras iha lezada nia kanuruk, kidan no kakorok, lezada mós ba aprejenta keixa iha polísia. Antes ne'e arguidu ho lezada dikute malu tanba arguidu hakarak hola tan fetu seluk.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu sira ne'ebé imputa ba nia loos hotu, arguidu tuku dala rua iha lezada nia kanuruk, tebe dala ida iha lezada nia kidan parte karuk buti iha lezada nia kakorok tanba lezada deskofia fali arguidu atu hola tan fetu seluk, liu semana ida sira di'ak malu fali no arguidu mós husu ona deskulpa ba lezada, arrepende ninia hahalok, promete sei la komete kulaker krime iha futuru.

Alende ne'e lezada deklara katak arguidu tuku dala rua iha lezada nia kanuruk, tebe dala ida iha lezada nia kidan parte karuk buti iha lezada nia kakorok rezulta moras lezada ba ospítal hodi halo tratamentu, deklara tan katak lezada deskonfia de'it arguidu maibé la hare ho matan. Depoisde akontese sira di'ak malu fali no to'o agora arguidu la baku ona lezada.

Alegasaun finál

Prokuradór akresenta katak arguidu nia hahalok ne'e priense elementu krime ne'ebé imputa ba nia no previstu iha artigu 145 KP no lei nú.7/2010. Atu prevene arguidu nia hahalok ne'e iha futuru husu ba tribunál atu kondena arguidu ho pena prizaun fulan tolu suspende ba tinan ida.

Enkuantu defeza haktuir katak bazeia ba arguidu nia konviksaun hanesan konfesa faktu sira, di'ak malu ona ho lezada, arrepende ba ninia hahalok, foin primeiravés mai hatan iha tribunál, tanba ne'e husu ba tribunál fó pena ne'ebé adekua ba arguidu.

Desizaun

Depoisde avalia faktu hotu, tribunál prova katak arguidu tuku dala rua iha lezada nia kanuruk, tebe dala ida iha lezada nia kidan parte karuk buti iha lezada nia kakorok.

Bazeia ba faktu provadu sira no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no di'ak malu ona, nune'e tribunál konklui prosesu ne'e no kondena arguidu ho pena prizaun fulan rua suspende ba tinan ida.

4. Krime ofensa ba integridade física simples ho natureza violénsia doméstika

Nú. Prosesu : 0021/21.BCEVN

Kompozisaun Tribunál : Singulár

Juis : Dra. Sribuana da Costa
Prokuradór : Dr. João Marques
Defeza : Dr. Sidonio Maria Sarmiento
Desizaun : Pena prizaun fulan 6 suspende ba tinan 1

Iha 09 Maiu 2022, Tribunál Distritál Baukau prezide leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu HSGdR nia feen, iha Munisípiu Baukau.

Akuzasaun Prokuradór

Prokuradór akuza katak iha 22 Novembru 2021 iha oras tuku 12:00 meiodia arguidu tuku dala ida iha lezada nia ulun, foti besi baza baku dala ida iha lezada nia ulun, foti kadera masa baku dala ida iha lezada nia kotuk laran, Antes ne'e arguidu ho lezada diskute malu kona-ba sira nia oan monu husi kama leten, arguidu hirus no halo agresaun hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu ne'ebé imputa ba nia ne'e loos hotu, arguidu tuku dala ida iha lezada nia ulun foti besi baza baku dala ida iha lezada nia ulun no foti kadera masa baku dala ida iha lezada nia kotuk laran. Antes ne'e arguidu ho lezada diskute malu kona-ba lezada halo sira nia oan monu husi kama leten, depoisde akontese sira di'ak malu ona, arrepende ninia hahalok, foin primeiravés mai hatan iha tribunál no promete iha futuru sei la baku tan lezada no membru família sira.

Alende ne'e lezada konfirma ba faku hotu iha akuzasaun, depoisde akontese sira di'ak malu ona no depoisde akontese la baku ona lezada to'o agora.

Alegasaun finál

Prokuradór haktuir katak arguidu provadu komete krime ofensa integridade fizika simples ho natureza violénsia doméstika hasoru lezada, mezmu sira di'ak malu ona maibé nafatin halo prevensaun atu arguidu la repete ninia hahalok ne'e iha futuru. Nune'e husu ba tribunál atu kondena arguidu ho pena prizaun fulan neen suspende ba tinan ida.

Enkuantu defeza haktuir katak arguidu konfesa faktu ne'ebé konstitui ba krime ne'e, di'ak malu ona, arrepende ninia hahalok, foin primeiravés halo agresaun hasoru lezada, ho razaun hira ne'e husu ba tribunál atu fó pena ne'ebé kmaan liu ba arguidu.

Desizaun

Depoisde avalia faktu hotu, tribunál prova katak arguidu tuku dala ida iha lezada nia ulun foti besi baza baku dala ida iha lezada nia ulun no foti kadera masa baku dala ida

iha lezada nia kotuk laran. Bazeia ba faktu provadu ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no di'ak malu ona, nune'e tribunál konklui prosesu ne'e no kondena arguidu ho pena prizaun fulan rua suspende ba tinan ida.

5. Krime ofensa ba integridade física simples ho natureza violência doméstica

Nú. Prosesu : 0029/21.BCLGA
Kompozisaun Tribunál : Singulár
Juis : Dra. Sribuana da Costa
Prokuradór : Dr. João Marques
Defeza : Dr. Grigório Maria Lourdes de Lima
Desizaun : Pena prizaun fulan 6 suspende ba tinan 1

Iha 09 Maiu 2022, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu hasoru AdSG nia feen, iha Munisípiu Lautein

Akuzasaun Prokuradór

Prokuradór akuza katak iha 10 dezembru 2021 iha oras tuku 05:00 lokraik arguidu tuku lezada, rasta lezada nia fuuk monu ba rai, buti lezada nia kakorok. Antes ne'e arguidu la hatan lezada atu faan sira nia fahi, arguidu ho lezada diskute malu no arguidu halo agresaun refere hasoru lezada.

Prokuradora akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu nega ba faktu sira iha akuzasaun no deklara tan katak lezada mak inventa faktu sira iha akuzasaun. Arguidu iha feen tolu.

Alende ne'e lezada mós deklara katak lezada ho arguidu diskute malu kona-ba lezada faan fahi maibé arguidu la hatan, arguidu tolok lezada no lezada mós tolok fali arguidu, arguidu tuku no rasta nia fuuk monu tun ba rai no arguidu buti lezada nia kakorok. Depoisde akontese sira di'ak malu fali no to'o agora la baku ona lezada.

Alegasaun finál

Prokuradór konsidera katak arguidu provadu komete krime tuir arguidu 145 KP no lei nú.7/2010 mezmú arguidu nega faktu sira iha akuzasaun maibé lezada nafatin konfirma faktu sira. Prokurador konsidera katak ema ne'ebé arguidu baku ne'e arguidu nia feen rasik tuir loloos arguidu hanesan la'en mak tenke proteze maibé pelu kontrariu. Tanba ne'e husu ba tribunál atu kondena arguidu ba pena prizaun fulan neen suspende ba tinan ida

Entretantu, defeza alega katak mezmú arguidu nega faktu sira hotu maibé haree ba produsaun prova ne'ebé iha, parte defza konkorda prokuradór nia algesaun.

Desizaun

Depoisde avalia faktu sira hotu, tribunál prova katak arguidu tuku lezada, rasta lezada nia fuuk monu ba rai no buti lezada nia kakorok. Bazeia ba faktu provadu sira ne'e no tetu mós sirkunstánsia atenuante sira hanesan arguida konfesa faktu sira, arrepende ninia hahalok, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e kondena arguidu ho pena prizaun fulan rua suspende ba tinan ida.

6. Krime maus-tratus ba menór

Nú. Prosesu : 0041/20.MNMNT
Kompozisaun Tribunál : Koletivu
Juis : Dra. Florencia Freitas, Dr. José António d. Escurial no
Dra. Jumiaty Maria Freitas
Prokuradór : Dr. João Marques
Defeza : Dr. Jermano Guterres Ramos
Desizaun : Pena prizaun tinan 2 suspende ba tinan 2

Iha 10 Maiu 2022, Tribunál Distritál Baukau Prezide julgamentu leitura akordaun ba krime maus-tratus ba menór ne'ebé envolve arguida AS hasoru nia béi-oan MS ho idade tinan 9 , iha Munisípiu Manatuto.

Akuzasaun Prokuradór

Prokuradór akuza katak iha 21 Setembru 2020 iha oras tuku 09:00 dadeer arguida kesi lezadu ba airin uma nia depois lori ai-bebak baku dala ida iha lezadu nia matan fukun parte karuk, baku dala rua iha ibun, kanek no ran sai, baku dala rua iha ain parte loos no karuk. Antes ne'e lezadu ho nia ho kolega sira ba ku'u has iha ema nia to'os nune'e mak arguida halo agresaun refere hasru lezadu. Arguida sempre halo agresaun bei-beik hasoru lezada.

Prokurador akuza arguidu kontra artigu 155 KP kona-ba maus-tratus ba menór ho moldura penál tinan 2 to'o tinan 6 konjuga ho artigu 2, 3 , 35 no 36 LKVD.

Produsaun ba prova sira

Iha prosesu julgamentu, arguida deklara katak faktu ne'ebé imputa ba nia loos hotu nia uja duni ai-bebak baku lezadu, lezadu nu'udar arguida nia bei-oan rasik. Lezadu antes hela iha kupang mak arguida ba bolu iha kupang lori mai hela ho nia, arguida baku lezadu tanba ba ku'u bei-beik ema nia has no arguida mós tauk ema nain toman no tauk no preokupa lezadu monu tun husi has leten, arguida arrepende ninia hahalok no prometeiha futuru sei la halo tan krime hasoru lezadu ka ema seluk no foin primeiravés mai hatan iha tribunál, arguida mós la hirus maske nia bei-oan kesaar to'o tribunál maibé nia nafatin hadomi nia bei-oan.

Alende ne'e, lezadu deklara katak arguida baku duni nia liman, ain matan fukun no ibun to'o ran, baku dala barak no kesi nia iha ai-rin uma nian no ema seluk maka mai kore lezadu mós deklara katak nia apa iha kupang no nia inan mate ona no momentu

nia avo (arguida) ba bolu nia ba hela ho arguida ne'e nia sei idade tinan neen, lezadu dehan ba ku'u ema nia has ne'e mak nia arguida baku nia, depoisde akontese lezadu deside ba hela fali ho nia tiun.

Testemuña FMS nu'udar lezadu nia tiun depoimentu katak testemuña uma besik malu ho arguida nia uma ho distansia metru tolu, iha momentu ne'eba testemuña han hela derepente lezadu halai mai dehan avo baku hau, testemuña haree lezadu nia ibun ran, ain kanek, testemuña mós fó hatene atu labele baku tan ona maibé arguida duni tuir nafatin nune'e lezadu halai liu ba komandate polísia nia uma, testemuña deklara katak foin primeiravés lezadu tanis no halai ba testemuña nia uma maibé testemuña lahatene razaun saida mak arguida baku lezadu.

Alegasaun finál

Prokuradór haktuir katak arguida konfesa no rekuñese katak halo duni agresaun hasoru lezadu ho razaun tanba lezadu sempre ba ku'u ema nia has no hahalok ne'e la'os foin primeiravés maibé antes ne'e mós arguida baku lezadu tanba lezadu ninia hahalok ne'e, maske arguida uja maneira ne'e hodi eduka lezadu maibé hahalok ne'e lei bandu no arguida nia hahalok ne'e priense elementu krime maus-tratus ba menór, tanba ne'e husu ba tribunál atu kondena arguida ho pena mínimu husi krime ne'e suspende nia ezekusaun iha periodu hanesan.

Defeza akresenta tan katak arguida konfesa faktu hotu ne'ebé imputa ba nia, arguida arrepende nia hahalok no deklara sei la halo tan hahalok hanesan iha futuro, tanba ne'e husu ba tribunál atu fó pena ne'ebé mais adekudu.

Desizaun

Depoisde avalia faktu hotu, tribunál prova katak arguida sempre halo agresaun hasoru lezadu, arguida kesi lezadu ba airin uma nian depois lori ai-bebak baku dala ida iha lezada nia mata fukun parte karuk, baku dala rua iha ibun halo kanek no ran, baku dala rua iha ain parte loos no karuk. Bazeia ba faktu provadu sira ne'e no tetu mós sirkunstánsia atenuante sira hanesan arrepende ona ninia hahalok, nune'e tribunál konklui prosesu ne'e kondena arguidu ho pena prizaun tinan rua suspenbe ba tinan rua.

7. Krime arma brankas

Númeru prosesu	: 0013/20. MNLLB
Kompozisaun tribunál	: Koletivu
Juís	: Dr. José António d. Escorial, Dra. Jumiaty Maria Freitas no Dra. Florencia Freitas
Prokuradór	: Dr. Ambrosio Rangel Freitas
Defeza	: Dr. Germano Guterres Ramos
Desizaun	: Pena prizaun tinan 3 suspende ba tinan 3

Iha 11 Maiu 2022, Tribunál Distritál Baukau prezide Julgamentu leitura akordaun ba krime arma brankas ne'ebé envolve arguidu Adelino Soares hasoru Estadu RDTL iha Orlalan Postu Administrativu Laklubar Munisípiu Manatuto.

Akuzasaun Prokuradór

Prokuradór akuza katak iha 07 Abril 2020 iha oras tuku 09:00 dadeer lezada haruka arguidu ba sosa kafé dos tomak maibé arguidu ba hola fali kafé pag deit no lezada husu osan restu iha arguidu. Arguidu ho hirus foti katana tetak rahun tiha ai-funan sira no ba foti tan dima ne'e mak halo lezada tauk ba hato'o keixa iha eskuadra Polísia Laklubar.

Prokuradór akuza arguidu kontra artigu 20 (1) husi lei Arma barnkas ho moldura penál tinan 3 to'o tinan 6.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, arguidu deklara katak katana ne'e bai-bain nia uza ba atividade agrikultór no dima uza ba kasa. Arrepende ninia hahalok, foin primeiravés mai hatan iha tribunál.

Alende ne'e, , tribunál presinde ka larona ona testemuña Marquita de Oliveira nu'udar arguidu nia feen tanba arguidu konfesa faktu iha akuzasaun.

Alegasaun finál

Prokuradór haktuir katak arguidu nia hahalok ne'e priense krime arma brankas arguidu rasik konfirma, arguidu uza katana no dima la tuir nia funsaun maibé uza fali ba aktu krime, tanba ne'e husu ba tribunál atu kondena arguidu ho pena prizaun tinan 3 suspende ba tinan 3.

Entretantu, defeza akresenta katak iha produsaun prova arguidu konfesa faktu hotu iha akuzasaun, arrepende ninia hahalok no foin primeiravés mai hatan iha tribunal, tanba ne'e husu ba tribunál aplika pena ne'ebe mais adekuaudu.

Desizaun

Depoisde avalia faktu hotu, tribunál prova katak arguidu foti katana tetak rahun ai-funan sira no ba foti tan dima no halo lezada tauk nune'e lezada ba hato'o keixa. Bazeia ba faktu provadu sira ne'e no tetu mós sirkunstánsia atenuante sira hanesan arrepende ninia hahalok, nune'e tribunál konklui prosesu ne'e no kondena arguidu ho pena prizaun tinan tolu suspenbe ba tinan tolu.

8. Krime ofensa integridade fizika simples, Armas Brankas no Rama Ambon

Nú. Prosesu : 0020/20. MNMNT
Kompozisaun Tribunál : Koletivu
Juis : Dra. Florencia Freitas, Dr. José António d. Escurial no
Dra. Jumiaty Maria Freitas
Prokuradór : Dr. Ambrosio Rangel Freitas
Defeza : Dr. Grigório Maria Lourdes de Lima
Desizaun : Krime Arma Brankas pena prizaun tinan tolu suspende ba tinan tolu no absolve krime rama ambon

Iha 10 Maiu 2022, Tribunál Distritál Baukau prezide julgamentu leitura akordaun ba krime armas brankas no *rama rambon* ne'ebé envolve arguidu arguidu Anacleto Machado Pereira no Marcelino da Costa Martins hasoru lezadu João Manuel da Silva no Inacio Ozil da Costa Ximenes, iha suku Ailili Postu Administrativu Manatuto Munisípiu Manatuto,

Akuzasaun Prokuradór

Prokuradór akuza katak iha sigunda feira iha 02 Marsu 2020 iha oras tuku 01:00 madrugada iha estrada publiku Dili-Baukau, iha merkadu Manatuto, suku Ailili, postu administrativu Manatuto. Iha momentu ne'eba testemuña João Manuel da Silva ho nia feen Sandra Paula Elezinha Soares, foin fila husi tasi tanba sira ba meti, bainhira to'o iha fatin-área merkadu ne'e arguidu Anacleto Machado Pereira ho Marcelino da Costa Martins halai ba Estrada klaran hodi hapara sira nune'e arguidu Anacleto Machado Pereira hasai tudik atu sona João Manuel da Silva, lezadu Inacio Ozil da Costa Ximenes halai mai salva, ho tauk João Manuel da Silva latan tun nia motor hodi halai. Tanba deita atu salva lezadu João Manuel da Silva ho nia feen arguidu sona tudik kona fali lezadu Inacio Ozil da Costa Ximenes nia ain halo kanek. Arguidu Anacleto rai hela *rama ambon* hitu iha nia uma.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa konjuga ho artigu 20 (1) no 19 kona-ba lei arma brankas.

Konsiliaun

Antes tama ba produsaun ba prova sira, bazeia ba artigu 262 KPP kona-ba tentativa konsiliaun, tribunál halo tentativa konsiliaun ba arguidu no lezadu sira relasiona ho krime ofensa ba integridade física simples tanba kazu ne'e klasifika nu'udar krime semi-públiku no nia prosedimentu depende ba keixa.

Iha prosesu konsiliaun ne'e, antes arguidu sira ho lezadu sira konsilia hodi dame malu perante lider komuniatriu arguidu sira husu ona deskulpa no fó osan US\$90.00 ba lezadu sira. Perante tribunál bazeia ba sira nia akordu antes no lezadu hakarak deziste nia keixa hasoru arguidu sira relasiona ho krime ofensa ba integridade física simples. Bazeia ba konkordánsia husi parte rua ne'e, tribunál omologa krime ofensa ba integridade física simples. Entretantu ba krime arma Brankas no *rama ambon*, tribunál kontinua ba prosesu julgamentu.

Produsaun ba prova sira

Iha prosesu julgamentu, arguidu Anacleto Machado Pereira deklara katak antes ne'e sira halo selebrasaun kolega nia tinan mak derepente arguidu ho kondisaun lanu iba hapara testemuña ho nia feen, arguidu deklara momentu ne'eba nia lori duni tudik maibé kona-ba *rama ambon* nia lahatene tanba nia iha ona sela detensaun mak testemuña Simplisio lori ba apresenta iha polisia.

Arguidu Marcelino da Costa Martins deklara katak momentu neeba sira hapara duni testemuña no lezadu atu tebe sai tudik husi arguidu Anacleto Machado Pereira nia liman mak kona fali nia ain, antes sira laiha problema ruma, tanba deit sira kondisaun lanu mak halo aktu sira nee. Arguidu la hatene kona-ba *rama ambon*, momentu ne'e arguidu iha ona sela polisia mak polisia foin dehan arguidu iha *rama ambon* maibe arguidu la hatene kona-ba *rama ambon* ne'e.

Testemua Simplisio Soares nu'udar uma nain depoimenta katak momentu ne'eba kalan boot ona no nia toba dukur hela nune'e nia lahatene kona-ba problema ne'e maibe iha dadeer bainhira testemuña ba lulun biti mak haree hetan rama ambon iha arguidu Marcelino da Costa Martins nia fatin, iha biti okos *rama ambon* hamutuk hitu maibe fiska la iha no momentu ne'e arguidu iha ona Polisia ne'e mak testemuña lulun tiha biti refere foin hetan objetu refere no nia la hatene objetu ne'e arguidu nian ka lae.,. Arguidu nia fatin ne'e antes ema husi foho mai sempre toba iha arguidu nia fatin, maibe antes semana ida akontese ne'e ema ruma la mai toba iha sira nia uma inklui arguidu nia fatin.

Alegasaun finál

Prokuradór haktuir katak arguidu Anacleto Machado Pereira provadu komete krime arma brankas. Husu absolve arguidu Marcelino da Costa Martins husi krime arma brankas. Entertantu arguidu Marcelino da Costa Martins provadu komete *krime rama ambon* tanba testemuña deklara katak antes emana ida nia laran la iha ema ruma mai toba iha sira nia uma inklui arguidu nia kuartu depoisde akontese, iha kalan testemuña ba revista arguidu nia fatin no hetan duni *rama ambon* refere iha arguidu nia fatin. Prokurador la iha duvida husu ba tribunál kondena arguidu sir aba pena prizaun tinan liman.

Entretantu, defeza akresenta katak konkorda prokuradór nia alegasaun ba arguidu Marcelino da Costa Martins kona ba krime arma Brankas. Arguidu Anacleto Machado Pereira konfesa uza duni tudik. Kona-ba arguidu Marcelino da Costa Martins parte defeza sei duvida ho testemuña nia depoimentu tanba antes ne'e familia sira mai vizita no toba tan iha nia uma, antes ne'e testemuna nunka lulun biti no momentu ne'e nia lulun biti hetan kedas *rama ambon* nia isin maibe fiska la iha, antes ne'e arguidu nunka lulun biti iha arguidu nia fatin. Tanba ne'e husu ba tribunál atu absolve arguidu.

Desizaun

Depoisde avalia faktu hotu, tribunál prova katak arguidu nain rua komete koa autoria ba krime arma brankas artigu 20 (1) no arguidu nain rua la provadu komete krime *rama ambon* iha artigu 19. Bazeia ba faktu provadu sira ne'e no tetu mós sirkunstánsia atenuante sira hanesan arrepende ninia hahalok, foin primeiravés mai hatan iha tribunál nune'e tribunál konklui prosesu ne'e no kondena arguidu ba krime arma Brankas tribunal kondena arguidu sira ho pena prizaun tinan tolu suspende ba tinan tolu no ba krime *rama ambon* tribunál absolve arguidu nain rua husi prosesu.

9. Krime ofensa ba integridade física simples ho natureza violéncia doméstika

Nú. Prosesu : 0004/21.MNSBD

Kompozisaun Tribunál : Singulár
Juis : Dra. Sribuana da Costa
Prokuradór : Dr. Bartolomeu de Araújo
Defeza : Dr. Sidonio Maria Sarmentu
Desizaun : Pena prizaun fulan 1 supende ba tinan 1

Iha 11 Maiu 2022, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu YdSB hasoru nia feen, iha Munisípiu Manatuto.

Akuzasaun Prokuradór

Prokuradór akuza katak iha sesta feira 24 Setembru 2021 iha oras tuku 08:00 dadeer arguidu basa lezada nia hasan parte karuk no parte loos, uza liman sikun fai dala rua iha lezada nia kotuk laran rezulta lezada monu ba rai no tilun mean, Antes ne'e lezada rona informasaun katak arguidu kuando tun ba Dili sempre ba *karaoke* ho fetu ida naran Elisa nolezada husu arguidu, maibé lasimu hirus nohalo agresan hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak katak arguidu basa lezada nia hasan parte karuk no parte loos, uza liman sikun fai dala rua iha lezada nia kotuk laran, lezada monu ba rai, depoisde akontese sira di'ak malu fali, arrepende ninia hahalok arguidu promete sei la halo tan krime hanesan hasoru lezada no membru família sira seluk.

Alende ne'e lezada konfirma faktu hotu iha akuzasaun depoisde akontese sira di'ak malu fali, no to'o agora arguidu la baku ona lezada.

Alegasaun finál

Prokuradór haktuir katak arguidu provadu komete krime tuir artigu 145 KP no lei Nu.7/2010 LKVD. Mezmu sira di'ak malu ona maibé nafatin atu prevene sira nia moris hamutuk iha futuru hodi la repete tan nia hahalok hasoru lezada no membru família sira. Nune'e husu ba tribunál atu kondena arguidu ho pena multa ba loron lima nulu ne'ebé kada loron sei selu 0.50 sentavus.

Entretantu, defeza haktuir katak arguidu konfesa faktu hotu iha akuzasaun, arrepende ninia hahalok, di'ak malu ona, foin primeiravés mai hatan iha tribunál no arguidu mós kolabora ho justisa. Tanba ne'e husu ba tribunál aplika pena kmaan ba arguidu.

Desizaun

Depoisde avalia faktu hotu, tribunál prova katak arguidu basa dala ida iha lezada nia hasan parte karuk no loos lori liman sikun fai dala rua iha kotuk laran halo lezada monu tun ba rai no tilun mean. Bazeia ba faktu provadu ne'e no tetu mós sirkunstánsia

atenuante sira hanesan, foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun fulan ida suspende ba tinan ida.

10. Krime maus-tratus ba konjuje

Nú. Prosesu : 0024/20.BCLGA
Kompozisaun Tribunál : Koletivu
Juis : Dr. José António d. Escurial, Dra. Florensia Freitas no
Dra Jumiaty Maria Freitas
Prokuradór : Dr. João Marques
Defeza : Dr. Sidonio Maria Sarmiento
Desizaun : Pena prizaun tinan 2 suspende ba tinan 2

Iha 18 Maiu 2022, Tribunál Distritál Baucau prezide julgamentu leitura akordaun ba krime maus-tratus ba kónjuje ne'ebé envolve arguidu FdCX hasoru nia feen, iha Munisípiu Baukau.

Akuzasaun Prokuradór

Prokuradóra akuza katak iha 07 Jullu 2020 iha oras tuku 16:00 lokraik arguidu uza fiu travaun motor nian hodi baku dala ida iha lezada nia hasan parte karuk rejulta kanek, hafoin iha loraun tuir mai iha 08 Jullu iha oras tuku 18:00 lokraik arguidu halo fali agresaun hasoru lezada, arguidu basa dala ida iha lezada nia hasan. Antes ne'e lezada diskute malu ho arguidu tanba arguidu tula nia feen primeiru ba Laga, arguidu hirus no halo agresaun hasoru lezada.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 konjuga ho artigu 2, 3(a), 35(a) no 36 LKVD.

Produsaun ba prova sira

Iha prosesu julgamentu, arguidu deklar katak toman nia feen primeiru iha dalan ne'e mak arguidu tula ba uma bainhira arguidu fila ba uma lezada diskute malu ho arguidu no arguidu nervozu halo agresaun hasoru lezada. Depoizde akontese sira di'ak malu fali, arrepende ninia hahalok, foin primeiravés mai hatan iha tribunál no to'o agora la baku ona lezada.

Alende ne'e lezada deklar katak iha 07 Jullu 2020 iha oras tuku 16:00 lokraik lezada diskute malu ho arguidu kona-ba arguidu tula feen boot, arguidu nervozu foti fiu travaun motor nian baku dala ida iha lezada nia hasan parte karuk no iha 08 Jullu iha oras tuku 18:00 loraik kontinua dsikute malu, arguidu basa dala ida iha lezada nia hasan, depoizde akontese sira di'ak malu fali noto'o agora la baku ona lezada.

Alegasaun finál

Prokuradór haktuir katak arguidu provadu komete krime maus-tratus hasoru lezada bazeia ba arguidu nia deklarasaun no lezada nia konfirmasaun. Mezmu sira di'ak malu ona maibé nafatin atu prevene sira nia moris hamutuk iha futuru hodi la repete tan nia hahalok hasoru lezada no membru família sira. Nune'e husu ba tribunál atu kondena arguidu ho pena prizaun tinan 2 suspende ba tinan 2.

Aleinde ne'e defeza haktuir katak arguidu konfesa faktu sira iha akuzasaun, depoisde akontese arguidu hatudu nia arrendementu no ho hanoin rasik di'ak malu fali ho lezada no foin primeiravés mai hatan iha tribunál. Tanba ne'e husu ba tribunál aplika pena ne'ebé kmaan ba arguidu.

Desizaun

Depoisde avalia faktu hotu, tribunál prova katak arguidu iha loron rua tuir malu iha 07 no 08 Jullu 2020 arguidu halo agresaun hasoru lezada, arguidu uza fiu travaun motor nian baku dala ida iha lezada nia hasan parte karuk no kontinua baku dala ida iha lezada nia hasan.

. Bazeia ba faktu provadu sira ne'e no tetu mós sirkunstánsia atenuante sira hanesan, foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

11. Krime ofensa ba integridade física simples ho natureza violéncia doméstika

Nú. Prosesu	: 0004/22 BCEVN
Kompozisaun Tribunál	: Singulár
Juis	: Dra. Sribuana da Costa
Prokuradór	: Dr. Ambrosio Rarngel Freitas
Defeza	: Dr. Sidonio Maria Sarmento
Desizaun	: Pena prizaun fulan 1 suspende ba tinan 1

Iha 18 Maiu 2022, Tribunál Distritál Baukau prezide julgamentu leitura sentenssa ba krime ofensa integridade simples ho natureza violéncia doméstika ne'ebé envolve arguidu ING hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 27 Fevreiru 2022 iha oras tuku 12:00 kalan arguidu nervozu tuku dala tolu iha lezada nia ulun parte kotuk, tebe dala ida kona iha lezada nia inus no hirus matan. Antes ne'e arguidu ho lezada diskute malu kona-ba sira nia-aon ne'ebé tanis, arguidu nerbozu no halo agresaun refere hasoru lezada.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak kalan boot labrik tanis arguidu dehan ba lezada atu ko'us labarik ne'e maibé lezada kuu tan fali labarik no halo labarik tanis makaas ne'e mak arguidu hirus halo agresaun hanesan iha akuzasaun. Depoisde akontese liu loron rua sira diak malu fali, arrende ninia hahalok, durante forma familia husi 2017 iha ona oan rua foin primeiravés baku lezada nodepois akontese to'o agora la baku ona lezada.

Entretantu lezada konfirma faktu hotu iha akuzasaun inklui konfirma arguidu nia deklarasaun, depoisde akontese sira di'ak malu fali, hela hamutuk nafatin iha uma ida no to'o agora la baku ona lezada.

Alegasaun finál

Prokuradór haktuir katak mezmú sira di'ak maibé ema ne'ebé arguidu halo agresaun ne'e arguidu nia feen tuir loloos arguidu mak ema primeiru fó protesau n másimu ba lezada maibé pelu kontrariu mezmú sira di'ak malu ona maibé atu prevene arguidu nia hahalok ne'e iha futuru atu labele hatoman-an rezolve problema uma laran ho krime. Tanba ne'e husu ba tribunál atu kondena arguidu ba pena prizaun fulan neen suspende ba tinan ida.

Entretantu, defeza akresenta katak arguidu konfesa faktu sira ne'ebé mak konstitui ba krime, arrepende ba ninia hahalok, di'ak malu ona ho lezada, foin primeiraves mai hatan iha tribunal no promete ba futuru sei la baktu tan ona lezada. Tanba ne'e husu ba tribunal atu aplika pena ne'ebe kmaan ba arguidu.

Desizaun

Depoisde avalia faktu hotu, tribunál prova katak arguidu tuku dala tolu iha lezada nia ulun parte kotuk no tebe dala ida kona iha inus no hirus matan. Bazeia ba faktu provadu sira ne'e no tetu mós sirkunstánsia atenuante sira hanesan arrepende ona ninia hahalok, foin primeravés mai hatan iha tribunál, sira moris separa ona nune'e tribunál konklui prosesu ne'e no kondena arguidu ho pena prizaun fulan ida suspende ba tinan ida.

12. Krime ofensa ba integridade física simples ho natureza violência doméstica

Nú. Prosesu	: 0002/20. LALRO
Kompozisaun Tribunál	: Koletivu
Juis	: Dra. Sribuana da Costa Dra. Florensia Freitas no Dr. José António d. Escurial
Prokuradór	: Dr. João Marques
Defeza	: Dr. Sidonio Maria Sarmento
Desizaun	: Pena prizaun fulan 6 suspende ba tinan 1

Iha 30 Maiu 2022, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu FL hasoru nia feen, iha Munisípiu Lautein.

Akuzasaun Prokuradór

Prokuradór akuza katak iha 11 Fevereiro 2020 iha oras tuku 08:30 dadder lezada hein kareta atu ba Vemasse, kareta mai lezada ho nia oan sira sae tiha, arguidu ba uluk hein iha ai-teka laran arguidu hapara kareta no haruka lezada tun husi kareta no rasta tun lezada husi kareta no atu rasta tan nia oan sira mak motorista kareta ko'alia netik, lezada tun tiha arguidu foti ai bauku dala ida iha lezada nia ulun hetan kanek boot hafoin arguidu soe tiha ai foti fali ai seluk duni tuir lezada no dehan *ó ba ona fo hatene*

Polisia depois mak hau ba tuir, lezada ba hato'o keixa iha Polisia no kontinua ba halo tratamentu tanba lezada hetan kanek suku pontu lima no lezada nia kanek kuaze semana ida foin di'ak.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 konjuga ho artigu 2, 3(a), 35(a) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arguidu deklarata katak sira moris hamutuk desde tinan 2013, iha ona oan nain tolu mak foin primeiravés baku lezada. Antes ne'e arguidu ho lezada hela hamutuk iha Vemasse tanba arguidu nia aman moras ne'e mak sira ba haree, bainhira arguidu nia aman di'ak tiha mak sira fila..Lezada sein razaun sai husi uma no la informa ba arguidu ne'e mak arguidu hirus halo agresaun hasoru lezada. Depoisde akontese lezada ba hela iha Vemasse bainhira arguidu ho nia família ba tuir hodi rezolve ho lezada nia família maibé la laiha solusaun no to'o agora sira moris separa.

Iha parte seluk, lezada konfirma faktu sira iha akuzasaun no deklarata katak durante sira forma família no iha aon nain tolu, arguidu foin primeiravés baku lezada, depoisde akontese lezada ho labarik nain rua hela iha Vemasse no labrik ida seluk hela ho arguidu iha Luro. Família sira hasoru malu ona iha Vemasse (iha lezada nia inan-aman nia uma) hodi ko'alia kona-ba sira nia problema maibé la iha solusaun no to'o agora sira moris separa.

Alegasaun finál

Prokuradór haktuir katak arguidu komete krime maus-tratus ba kónjuje tuir artigu 154 KP, iha produsaun prova arguidu konfesa faktu katak baku dala ida de'it, foin primeiravés baku lezada no lezada rasik konfirma arguidu nia deklarasaun. Ho razaun hirak ne'e husu halo alterasaun jurídiku ba artigu 145 KP kona-ba ofensa ba integridade fizika simples ho natureza violénsia doméstika. Nune'e husu ba tribunál atu aplika pena prizaun tinan ida suspende ba tinan ida.

Entretantu defeza konkorda ho Prokuradór nia alegasaun no haree ba sirkunstansia sira hotu hanesan konfesa, arrepende ninia hahalok no foin primeiravés baku lezada. Tanba ne'e husu ba tribunál atu aplika pena ne'ebé kmaan ba arguidu.

Desizaun

Depoisde avalia faktu hotu tribunál prova katak arguidu hapara kareta, haruka lezada tun husi kareta no rasta tun lezada husi kareta, bainhira arguidu atu rasta tan sira nia oan mak motorista kareta ko'alia netik nune'e arguidu la dada tun nia oan sira. Depois rasta lezada tun tiha husi kareta arguidu foti ai baku dala ida iha lezada nia ulun no

hetan kanek boot, hafoin arguidu soe tiha ai, foti fali ai seluk ida duni tuir lezada. Bazeia faktu sira tribunál halo altersaun jurídku husi artigu 154 KP ba iha artigu 145 KP. Bazeia ba faktu provadu sira ne'e no tetu mós sirkunstánsia atenuante sira hanesan, foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

13. Krime ofensa ba integridade fízika simples ho natureza violénsia doméstika

Nú. Prosesu : 0007/22. BCBCV
Kompozisaun Tribunál : Singulár
Juis : Dra. Sribuana da Costa
Prokuradór : Dr. João Marques
Defeza : Dr. Grigório Maria Lourdes de Lima
Desizaun : Pena prizaun fulan 2 suspende ba tinan 1

Iha 30 Maiu 2022, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu HdCB hasoru nia feen, iha Munisípiu Baukau.

Akuzasaun Prokuradóra

Prokuradóra akuza katak iha 30 Dezembru 2021 iha oras tuku 14:00 lokraik arguidu tebe dala ida iha lezada nia kanotak parte loos, rasta lezada nia fuuk no tebe dala ida iha lezada nia matan fukun parte loos. Antes ne'e arguidu husu hahan ba lezada atu han maibé lezada la hatan, arguidu nerbosu halo kedas agresaun refere hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara faktu ne'ebé imputa ba nia ne'e loos hotu no rekuiñese katak momentu ne'e nia sente hamlaha no husu duni etu, depoisde akontese sira di'ak malu fali, arrepende ninia hahalok, promete sei la baku tan lezada iha futuru no arguidu nu'udar badaen ho vensimentu kada fulan US\$100.00.

Entretantu lezada deklara katak sira diskute malu kona-ba arguidu husu hahan, derepente arguidu tebe dala ida iha lezada nia kanotak parte loos, rasta lezada nia fuuk to'o monu ba rai hafoin arguidu tebe tan dala ida iha lezada nia matan fukun parte loos, bainhira lezada haree arguidu toba ona mak lezada halai ba hato'o keixa no halo taratemntu iha sentru saúde Baukau.

Alegasaun finál

Prokuradór haktuir katak akuzasaun ne'ebé imputa ba arguidu ne'e provadu hotu, bazeia ba arguidu nia deklarasaun no lezadu nia konfirmasaun. Liutan lezada mós deklara katak antes ne'e arguidu halo ona agresaun hasoru lezada no mai hatan ona iha tribunál, nune'e atu halo prevensaun ba arguidu nia hahalok iha futuru husu ba tribunál atu kondena arguidu ho pena prizaun tinan 1 fulan 6 suspende másimu ba krime ne'e rasik.

Enkuantu defeza akresenta katak bazeia ba produsaun prova arguidu konfesa no lezada mós konfirma, di'ak malu ona ho lezada atu prevene arguidu nia hahalok iha futuru hodi labele komete tan krime hasoru lezada. Ho razaun hirak ne'e parte defeza konkorda prokuradór nia alegasaun.

Desizaun

Depoisde avalia faktu hotu, tribunál prova katak arguidu tebe dala ida iha lezada nia kanotak parte loos rasta lezada nia fuuk no tebe dala ida iha lezada nia matan fukun parte loos.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, di'ak malu ona ho lezada, nune'e tribunál konklui prosesu ne'e no kondena arguidu ho pena prizaun fulan rua suspende ba tinan ida.

14. Krime maus-tratus ba konjuje no arma brankas

Nú. Prosesu : 0005/20.BCSIC
Kompozisaun Tribunál : Koletivu
Juis : Dra.Florensia Freitas, Dra. Jumiaty Maria Freitas no
Dr. José António d. Escurial
Prokuradór : Dr. Bartolomeu de Araújo
Defeza : Dr. Sidonio Maria Sarmiento
Desizaun : Pena prizaun tinan 2 suspende ba tinan 2

Iha 30 Maiu 2022, Tribunál Distritál Baucau prezide julgamentu leitura akordaun ba krime maus-tratu ba kónjuje no arma brankas ne'ebé envolve arguidu JdCP hasoru nia feen, iha munisípiu Baukau.

Akuzasaun Prokuradór

Prokurador akuza katak Iha 06 Janeiru 2020 iha oras tuku 19:30 lokraik arguidu lori fatuk tuda dala ida iha lezada nia ain kabun no uza katana belar baku dala ida iha lezada nia kidun. Antes ne'e arguidu lahatan lezada lori sira nia oan ba halimar iha lezada nia tian nia uma, nune'e arguidu ho lezada diskute malu, arguidu hirus no halo agresaun hasoru lezada.

Akontesementu tuir mai iha 07 Janeiru 2020 iha oras tuku 7:30 lokraik, arguidu hodi fatuk tuku dala tolu iha lezada nia ulun, depois arguidu halai tama ba uma laran foti katana hodi duni lezada atu ta'a maibe lezada halai tiha ba viziñu Celcio nia uma. Motivasaun husi husi akontesimentu ne'e tanba sira nia oan hakarak arguidu kous maibe lezada lakohi,

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 konjuja ho artigu 2, 3, 35(a) no 36 LKVD no. artigu 20 (1) kona-ba lei arma brankas.

Produsaun ba prova sira

Iha prosesu julgamentu, arguidu deklara katak faktu hotu ne'ebe akuza ba nian ne'e loos sein rezerva, katana ne'e baibain arguidu uja hodi hamos du'ut, di'ak malu ona, foin primeiravés mai hatan iha tribunál, arrepende ba ninia hahalok depoisde akontese sira diak malu no la baku ona lezada to'o agora.

Alende ne'e lezada konfirma faktu sira iha akuzasaun depoisde akontese sira di'ak malu fali no to'o agora arguidu la baku ona lezada.

Alegasaun finál

Prokuradór haktuir katak arguidu provadu komete krime maus-tratus ba konjuje no arma brankas tanba arguidu uza katana la tuir ninia funsaun maibé uza fali ba krime hanesan uza baku no ameasa lezada. Razaun hirak ne'e husu ba tribunal aplika pena únika tinan lima ba arguidu.

Enkuantu defeza haktuir katak arguidu konfesa faktu hotu, kopera di'ak ho justisa di'ak malu ona, haree mós ba arguidu nia oan sira presija arguidu nia tau matan no arguidu arguidu mós agora dadauk prezu ba kazu seluk, razaun hirak ne'e husu ba tribunál aplika pena kmaan liu ba arguidu.

Desizaun

Depoisde avalia faktu hotu, tribunál prova katak iha 06 Janeiro 2020 iha oras tuku 7:30 lokraik arguidu lori fatuk tuda lezada dala ida kona iha lezada nia ain kabun no lori katana nia belar bakudala ida iha lezada nia kidun. Tribunál mós prova akontesementuiha lora 07 Janeiro 2020 iha oras tuku 7:30 lokraik, arguidu lori fatuk tuku dala tolu iha lezada nia ulun depois arguidu halai tama ba uma laran foti katana hodi duni lezada atu ta'a maibé lezada halai tiha ba viziñu nia uma Bazeia ba faktu provadu sira ne'e no tetu mós sirkunstánsia atenuante sira hanesan arrepende ninia hahalok, foin primeravés mai hatan iha tribunál, nune'e tribunál konklui prosesu ne'e no kondena arguidu ho pena únika tinan rua suspende ba tinan rua.

15. Krime abuzu seksuál ba menór

Nú. Prosesu	: 0002/21.MNLCL
Kompozisaun Tribunál	: Koletivu
Juis	: Dra. Sribuana da Costa, Dra.Floresia Freitas no Dr. José António d. Escorial
Prokuradór	: Dr. Bartolomeu de Araújo
Defeza	: Dr. Manuel Tilman (Advogadu)
Desizaun	: Pena unika tinan 15 prizaun

Iha 31 Maiu 2022, Tribunál Distritál Baukau prezide julgamentu leitura akordaun ba krime abuzu seksuál ba menór ne'ebé envolve arguidu HdS hasoru lezada menor ho idade tinan 13, iha Munisípiu Manatuto.

Akuzasaun Prokuradór

Prokuradór akuza katak iha 11 Marsu 2020 iha oras tuku 12:00 meiodia lezada foin sai husi eskola fila ba uma iha dalan fuik arguidu ho katana subar hein lezada, derrepente

arguidu kaer lezada nia liman rasta ba kotuk no obriga lezada atu halo relasaun seksuál maibé lezada lakoi tanba arguidu ne'e lezada nia tiun. Arguidu hatan no ameasa lezada dehan *se ó lakohi hau oho mate ó soe iha ai-laran*. Hafoin ho obriga arguido kolu lezada nia rupa laran no halo relasaun seksuál ho lezada. Hafoin liu fali semana rua arguidu haree lezada nia inan-aman ba halo lia iha foho, arguidu halo tan relasaun seksuál iha lezada nia uma. Akontesementu tuir mai bainhira arguidu haree lezada nia inan ba hatama osan iha moris rasik nian no nia aman ba hanorin iha eskola no iha momentu ne'e lezada ba hamós du'ut iha to'os no arguidu halo tan relasaun seksuál, ikus liu arguidu haree lezada nia aman ba foti osan iha Dili no nia inan ba haree nia avo moras, arguidu aproveita halo tan relasaun seksuál ho lezada.

Prokuradór akuza arguidu kontra artigu 177 KP kona-ba abuzu seksuál ba menór ho moldura penál tinan 5 to'o tinan 15.

Produsaun ba prova sira

Iha prosesu julgamentu, arguidu deklara katak sira halo duni relasaun seksuál hakrak ho hakarak la obriga, la uza katana ameasa lezada, primeiru, iha fulan Maiu 2020 sira halo relasaun seksuál iha lezada nia uma kotuk, liu semana rua arguidu fila husi kuru bé hasoru lezada sai husi eskola no bolu lezada no ba halo relasaun seksuál iha mota ulun, arguidu deklara katak sira halo relasaun seksuál hamutuk dala haat no sempre fó osan ba lezada no sira iha konkordansia katak sei hola malu nu'udar feen-la'en.

Alende ne'e Lezada deklara katak akontese primeiru arguidu lori katana hein iha dalan no lezada fila husi eskola asalta lezada dehan mai ita halo relasaun seksuál maibé lezada la komprende saida mak arguidu ba lezada, arguidu dada lezada tama du'ut laran hodi hasai nia rupa hodi halo relasaun seksuál no ameasa keta dehan sai ba inan-aman se lae oho tiha lezada, akontesementu sigundu arguidu haree lezada nia aman ba simu osan, nia inan ba setor osan iha moris rasik no alin sira ba kuru bé, arguidu aproveita ida ne'e ba ho katana ameasa lezada dada tama lezada ba kuartu laran halo tan relasaun seksuál. Akontesementu terseiru, lezada nia inan-aman ba hotu hanorin eskola no iha momentu ne'e lezada ba hamos batar du'ut, arguidu ho katana ameasa lezada hodi halo tan relasaun seksual. Akontesementu ba dala ikus nian bainhira lezada nia aman ba foti osan iha Dili no nia inan ba haree nia avo moras nune'e arguidu aproveita ba halo tan relasaun seksual ho lezada. Durante halo relasaun seksuál ne'e arguidu sempre ameasa lezada no lezada la iha komunikasaun ho arguidu.

Alegasaun finál

Prokuradór haktuir katak produsaun prova mezmú arguidu konfesa parsialmente ba faktu sira maibé lezada deklara katak durate sira halo relasaun seksuál ne'e arguidu sempre uza katana hodi ameasa lezada, nune'e prokurador konklui no knsidera katak arguidu provadu komete krime dala haat no konsidera abuzu seksuál ba menór ne'ebé ho idade foin tinan sanulu resin tolu. Tanba ne'e husu ba tribunál atu kondena arguidu ba pena únika tinan sanulu resin liman iha prizaun.

Entretantu, defeza haktuir katak krime haat ne'e loos no arguido rasik mós deklara katak nia halo relasaun seksuál dala haat ho lezada maibé relasaun seksuál ne'e ho

konsientemente, haree ba arguidu deklarasaun hotu husu ba tribunal atu fo justisa ne'ebé justu ba arguidu.

Desizaun

Depoisde avalia faktu hotu, tribunál prova katak arguidu halo duni relsaun seksuál dala haat ho lezada ne'ebé idade foin tinan sanulu resin tolu. Bazeia ba faktu provadu sira ne'e no tetu mós sirkunstánsia atenuante sira hanesan foin primeravés mai hatan iha tribunál, nune'e tribunál konklui prosesu ne'e kondena arguidu ho pena prizaun tinan sanulu resin tolu.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl